



## *Lou bielh Bouhadé* 228

En u clau dou cournè, penut per ue auelhe,  
 Que goàyti lou moumen oun lou hoec s'assoumelhe,  
 Puch, ta lèu coum lou bey qui s'aprèste à-s cluca,  
 Souptemén, d'u bouhat, qu'ou biéni hourruca,

E, coum u 'schàmi blanc de clares parpalholes,  
 Las brases à l'ensus que-n ban birouleyan,  
 Méntre que, per debat, abàmbi las halholes  
 Qui's gaudiran ballèu lou larè clareyan.  
 Au me bayla que bey escarcagna-s d'arrîde  
 Lous carbous esberitè e rouyes de plasé,  
 E que bouhi, ta pla, dou mati dingu'au sé  
 Qu'ey la gaute tarrîble e lou palmou soulîde !

Que bouhi ! Lou larè qu'et' u casau ta you  
 Oun hèy flouri, quoan bouy, en mates estiglantes,  
 Sus lous tisocs ardents las esbruses boulanges  
 Qui 'sperrequen lou hum d'eslambrecs de gauyou.  
 Que bouhi ! Que sèy ha chibiteya l'eslame,  
 E que bau desbelha deguen la bielhe arrame  
 Lou reclam assoupit de l'ayret printanè  
 Qui cantabe aus taroas de la coste arrouyengue.  
 Que bouhi ! Lou toupî gourman e hartanè,  
 Mercès à you, que bet sus sa pansarre eslengue  
 Lou hoec puya gayman e leca-u de poutous.  
 Que bouhi !...

Mes toutu, ma force que s'abache,  
 Que bàdi bielh... lou coé que se-m hè tout brastous  
 E qu'ey l'alet de mey en mey e braque e bache.  
 Lous claus de couyre bloun que-s plapen de berdet ;  
 Las taches que soun arrougnouses ; adare,  
 Lou brasouca glapaut que m'apère enta d'et,  
 Qu'at tròbi, qu'ey la mourt qui drin à drin debare.